

DECEMBAR 2017. • LIST RMU "BANOVICI"
BESPLATAN PRIMJERAK



RUDAR

SRETNNO

u novoj 2018. godini!!!

IZBORNA SKUPŠTINA SINDIKATA RUDNIKA

**NOVI PREDsjedNIK
SINDIKATA DR. MIRsAD KUKIĆ**

21. DECEMBAR DAN RUDARA BIH

**SVEČANO OBILJEŽEN
DAN RUDARA U RUDNIKU
"NAGRAĐENO 65 RADNIKA"**

PROIZVODNI REZULTATI U 2017. GODINI
**OSTVAREN GODIŠNJI PLAN
NA PROIZVODNJI UGLJA
I PREBAČAJ NA OTKRIVCI**

SVEČANA SJEDNICA UPRAVE I NADZORNOG ODBORA RUDNIKA

NAVRŠENO 14 GODINA KONTINUIRANOG POZITIVNOG POSLOVANJA RUDNIKA



U povodu obilježavanja 21. decembra Dana rudara BiH održana je Svečana sjednica Uprave i Nadzornog odbora RMU "Banovići" d.d. Banovići. Sjednici su prisustvovali potpredsjednik SDA BiH i predsjednik KO SDA dr. Mirsad Kukić, predsjednica OO SDA Banovići Elzina Pirić, predsjednik Skupštine TK Senad Alić, ministar unutrašnjih poslova Husein Topčagić, poslanici Skupštine TK, te predstavnici lokalne samouprave Banovići na čelu sa načelnikom Midhatom Husićem.

Uz čestitke rudarima direktor Društva dr. Munever Čeragić u svom obraćanju sumirao je ovogodišnje rezultate poslovanja Rudnika. Istakao je da se navršilo četrnaest godina kontinuiranog pozitivnog poslovanja, zbog čega Rudnik sa pravom predstavlja primjer uspješnog preduzeća koje postiže dobre rezultate i ostvaruje značajne prihode.

- Poslovanje u 2017. godini biće pozitivno oko 1,5 miliona KM. Proizvest ćemo i planirane količine uglja od 1.600.000 tona i realizovati preko 11 miliona metara kubnih otkrivke. Jedan od ključnih uslova ovakvog poslovanja je modernizacija proizvodnih pogona i kontinuirano ulaganje u novu opremu. U te svrhe ove godine investirali smo oko 9 miliona KM, a novi ciklus investiranja biće nastavljen slijedeće godine kada planiramo uložiti oko 62 miliona KM. - rekao je dr. Munever Čeragić.

Dotakao se i planiranih smjernica za dalji rad preduzeća. Posebno je naglasio značaj i opravdanost projekta izgradnje Termoelektrane u Banovićima, na kojem se trenutno dešavaju pozitivni pomaci.

- Mi smo u završnoj fazi usaglašavanja pregovora sa domaćim bankama oko kreditiranja 15% vrijednosti projekta, čime bi se zvanično i zatvorila finansijska konstrukcija za realizaciju istog. U toku su i aktivnosti za početak pripremnih radova, i to izgradnju radničkog kampa, finalno uređenje platoa za Termoelektranu, dovođenje vode za radnički kamp, kao i dovođenje gradilišnog napona sa trafostanice Banović Selo. - kazao je Čeragić.



Da je godina na izmaku bila uspješna govori i činjenica da je primljeno oko 260 novih radnika, da su ispunjeni svi proizvodni i finansijski planovi, te da se u novu godinu ulazi sa potpuno izmirenim dugovima prema državi, radnicima i dobavljačima.

Svečana sjednica bila je dobra prilika da se uruče priznanja i nagrade najzaslužnijim pojedincima kolektiva. Ove godine nagardeno je 65 radnika. Dodijeljena je i posebna plaketa predsjedniku Sindikata rudara FBiH dr. Saferu Mušanoviću za doprinos u razvoju sindikalnih odnosa u oblasti rudarstva.

Upriličen je i prigodan kulturno - zabavni program u kojem su učestvovali najmlađi građani Banovića. Također, na sjednici se emotivnim predstavila i ovogodišnja pobjednica literarnog natjecanja raspisanog povodom Dana rudara, Lejla Softić. Oficijalni dio završen je nastupom Kulturno - umjetničkog društva Banovići.

Nakon sjednice položeno je cvijeće na Centralnom spomen obilježju Banovići.

I Dan rudara u Banovićima obilježen je mnogobrojnim prigodnim manifestacijama, svečanim zborovima radnika iz svih organizacionih jedinica Rudnika, koncertom izvorne muzike, večeri KUD-a i sevdaha, sportskim takmičenjima i brojnim drugim sadržajima kojima se na najbolji način promovira rudarski poziv i bogata tradicija rudarenja na ovim prostorima. Kruna proslave Dana rudara i bio je tradicionalni vatromet, kojim je zvanično zatvoren program obilježavanja.

Još jednom je potvrđeno da rudari svojim radom svake godine pokazuju da se i u teškim uslovima rada mogu postizati dobri proizvodni rezultati zbog čega posao koji obavljaju zaslužuje posebno uvažavanje i duboko poštovanje.



LAUREATI RMU „BANOVIĆI“ D.D. BANOVIĆI ZA 2017. GODINU

NAGRAĐENO 65 RADNIKA RUDNIKA



Povodom 21. decembra Dana rudara BiH na Svečanoj sjednici Uprave i Nadzornog odbora Društva nagrađeno je 65 radnika. Dodijeljene su plakete za Zaslužne članove Društva i Plakete za doprinos u radu, kao i novčane nagrade u iznosu od 1.000 i 500 KM.

Nagradu „Zaslužni član Društva“ ove godine dobili su: Zijad (Mustafa) Lačić, Nedžad (Emin) Mujkić, Nihad (Osman) Brigić, Junuz (Meho) Alić, Nuraga (Džemo) Lugavić i Abdulah (Abdurahman) Jusić.

Iz pogona „Površinska eksploatacija uglja“ dobitnici Plakete za doprinos u radu su: Jasmin (Ramiz) Jamaković, Fehim (Đulaga) Bečić, Suad (Ibrahim) Kasumović, Admir (Muharem) Čeragić, Mirsad (Ibrahim) Haskić, Šemso (Ćamil) Glibanović, Azemina (Ibrahim) Avdić, Zijad (Redžo) Ahmetović, Zahid (Kadrija) Kurtić, Šaban (Jusuf) Zukić, Ćazim (Bajro) Karahodžić, Mehmedalija (Hasan) Čamrković,

Nedžad (Derviš) Mujkić, Suljo (Suljo) Lapandić, Hasan (Redžo) Šahbazović, Ekrem (Ahmet) Sarić, Nihad (Hasan) Pjević, Šahbaz (Šaban) Nuhanović i Ekrem (Fadi) Balkić.

Dobitnici Plakete za doprinos u radu iz pogona „Podzemna eksploatacija uglja“ su: Mersudin (Ibrahim) Haskić, Edis (Muhamed) Softić, Nevzet (Omer) Turić, Zahid (Džemal) Brkić, Sifet (Safer) Šahbazović, Mehmed (Hasan) Zorić, Mihret (Sadik) Šarić, Admir (Hasan) Avdić, Amir (Huso) Husić, Đulaga (Safer) Mujić i Enes (Mujo) Jahić.

Plaketu su dobili i najbolji pojedinci pogona „Separacija“ i to: Zijad (Hamdija) Gutić, Teufik (Muhamed) Dostović, Munira (Hamdija) Terzić, Muharem (Ćamil) Demirović, Nermin (Mustafa) Velagić, Bajro (Omer) Lugavić, Osman (Ibrahim) Ikanović, Husejn (Haso) Sarić, Munir (Bećir) Čamdžić i Kasim Starogorac.

Za doprinos u radu nagrađeni su i radnici „Željezničkog transporta“: Hariz (Mehmed) Đerzić, Džehvad (Džemal) Dedić, Mirsad (Ćazim) Mušanović, Refik (Hajdar) Mujkić, Šaban (Ćamil) Turić, Fikret (Ćamil) Nukić i Mustafa (Ahmet) Ikanović.

Iz organizacione jedinice „Standard i usluge“ Plaketu za doprinos u radu dobili su: Šeharzada Ljevšić, Šaha Ćebić i Zulejha Šehić.

Dobitnici Plakete iz organizacione jedinice „Direkcija“ su: Izet Avdić, Zijad (Mehmed) Kovačević, Enes Sejdinović, Amra (Emin) Tokić, Muzafer Softić, Ibrahim (Alija) Alispahić, Razija (Hamdija) Rahmanović i Derviša (Salko) Agić.



PROIZVODNI REZULTATI 2017. GODINE

OSTVAREN GODIŠNJI PLAN NA PROIZVODNJI UGLJA I PREBAČAJ NA REALIZACIJI OTKRIVKE

Na površinskim kopovima i jami „Omazići“ Rudnika „Banovići“ zaključno sa mjesecom novembrom proizvedeno je 1.434.651 tona separisanog uglja što je u granicama sa planiranom proizvodnjom za ovu godinu. Dobru proizvodnju uglja na kumulativnom nivou pratila je i proizvodnja otkrivke, te je u istom periodu realizovano 10.570.453 metara kubnih čvrste mase, što je za 3,8% više u odnosu na plan.

Mjesec novembar završen je sa prebačajem od 3,08% na proizvodnji uglja, odnosno proizvedeno je 148.138,6 tona. Jačim intenzitetom realizovana je otkrivka. Zabilježen je prebačaj od 23,7 %, odnosno proizvedeno je 1.013.355 metara kubnih čvrste mase. Šest dana prije kraja mjeseca decembra proizvedeno je 114.729,3 tona separisanog uglja, što je 104,14% u odnosu na plan. Uprkos problemima koji prate rad na kopovima u ovo doba godine realizovano je i 602.060 metara kubnih otkrivke.

U zavisnosti od vremenskih uslova do kraja godine za očekivati je da se decembarški proizvodni plan u potpunosti ispuni.

Važno je napomenuti da su svoj godišnji proizvodni plan na uglju i otkrivci površinski kopovi Rudnika ispunili trinaest dana prije kraja godine. Razlog tome je stabilna i kvalitetna proizvodnja tokom cijele godine kada je dnevni, pa i mjesečni plan, prebacivan i po nekoliko hiljada tona rovnog uglja.

Ovakvi godišnji rezultati proizvodnje ishod su zalaganja svih zaposlenih ali i dobre pripremljenost kopova i jamskih prostorija.

Ako se proizvodnja posmatra kroz isporučene toplotne vrijednosti uglja može se konstatovati da je godišnji plan u potpunosti ispunjen, jer je prosječna toplotna vrijednost uglja na nivou preduzeća u prvoj polovini godine iznosila 16,228 GJ/t, dok je planom bila predviđena u iznosu od 15,325 GJ/t. Što se tiče toplotne vrijednosti uglja prema Termoelektrani i tu su ispunjene, ali i prebačene, planirane veličine. Prosječna toplotna vrijednost uglja za Termoelektranu u prvih deset mjeseci tekuće godine ostvarena sa 14,947 GJ/t, dok je planom bila predviđena 13,878 GJ/t.





**IZBORNA SKUPŠTINA SINDIKALNE ORGANIZACIJE RMU "BANOVIĆI" d.d. BANOVIĆI
ODRŽANA 30.11.2017. GODINE**

ZA PREDSJEDNIKA SINDIKALNE ORGANIZACIJE IZABRAN Dr. MIRSAD KUKIĆ, dipl.inž.rud.

Sindikalni odbor Sindikalne organizacije RMU „Banovići“ d.d. Banovići donio je Odluku o provođenju izbora u Sindikalnoj organizaciji na svim nivoima sindikalnog organizovanja. Za sprovođenje izbora imenovana je Komisija u slijedećem sastavu: dr. Mirsad Bečić – predsjednik, Merima Hogić – sekretar, Dževad Hasić, Edin Haskić, Eniz Salkić, Nermin Velagić, Mehmed Numanović, Selma Dedić i Dževad Dostović.

Komisija je utvrdila Izborna pravila radi ravnopravne zastupljenosti svih radnih cjelina u organima Sindikata, te utvrdila Termin plan za provođenje izbornog procesa.

Kandidacioni zborovi na kojima su svi zaposlenici imali mogućnost predlaganja kandidata održani su 26. i 27. novembra 2017. godine, a Referendum na kome su zaposlenici tajnim glasanjem, na sedam biračkih mjesta, mogli izabrati svoje predstavnike održan je 29.11.2017. godine.

Nakon dostavljanja Izvještaja o provedenim izborima Sindikalni odbor zakazao je Izbornu Skupštinu Sindikalne organizacije koja je održana 30.11.2017. godine u Sali za sastanke Radničkog Doma Banovići. Sjednicom Sindikalne organizacije do izbora organa Skupštine predsjedavao je tada aktuelni predsjednik Sindikalne organizacije dr. Safer Mušanović koji je iznio kratak rezime sindikalnog djelovanja u proteklom periodu. Izrazio je zadovoljstvo što je bio

dio tima koji je proteklih 13 godina radio na očuvanju ovog kolektiva kao zasebnog pravnog subjekta.

- U tom periodu prolazilo se kroz teške momente, savladane su gotovo nesavladive prepreke. Na kraju je uvijek pobjeđivalo jedinstvo rudara koji su istrajni na očuvanju rudnika „Banovići“ i cjelokupne lokalne zajednice, zbog toga se zahvaljujem svim rudarima rudnika „Banovići“ kao i svima koji su dali svoj doprinos na postizanju naših ciljeva. Molio bih i novoizabrane sindikalne predstavnike da nastave tim putem. - kazao je dr. Mušanović.



Nakon podnesenog Izvještaja Komisije za provođenje izbora konstituisana je Skupština Sindikalne organizacije i izabrano rukovodstvo iste.

Za predsjednika Skupštine u narednom četverogodišnjem periodu izabran je Zijad Lačić, dok su za članove stalnog radnog predsjedništva Skupštine izabrani Hašim Kovačević i Almir Čolić, a za sekretara Skupštine Selma Dedić, koji su nakon izbora preuzeli zvanično vođenje Izborne Skupštine.

Funkciju delegata Skupštine u narednom mandatnom periodu obnašat će još i: Fahrudin Lugavić, Muhidin Tursunović, Samir Kantić, Adin Delić, Emir Idrizović, Husnija Čamdžić, Amir Balkić, Smajo Mahovkić, Suad Bojić, Mehmed Hasanović, Nermina Mujić, Ismet Alić, Sead Numanović, Latif Muharemović, Šaban Lugavić, Sabahudin Mulahalilović, Ibrahim Handalić, Ismet Šarić, Fehim Bečić, Senad Čerčić, Nevres Nurković, Zijad Ahmetović, Ramiz Džinić, Enes Demirović, Halil Beširović, Munib Čerčić i Enes Mujić.

Organe Sindikalne organizacije prema odredbama Statuta Sindikalne organizacije, kojima je na Skupštini, a na osnovu rezultata Referenduma, potvrđen mandat, pored Skupštine čine još i: Sindikalni odbor RMU „Banovići“ d.d. Banovići, Sindikalne podružnice i Sindikalne grupe organizovane po Organizacionim cjelinama Društva i to:

SP „Površinska eksploatacija uglja“ u koju su izabrani: Šaban Mešanović – predsjednik Sindikalne

podružnice, Bilal Lapandić, Enver Bojić, Hasan Mešanović, Senudin Husagić, Hajrudin Salihbašić i Vahid Bajrić.

U okviru Sindikalne podružnice „Površinska eksploatacija uglja“ djeluju i dvije Sindikalne grupe.

SG PK „Turija“ u koju su izabrani: Enver Bojić – predsjednik Sindikalne grupe, Bilal Lapandić, Suljo Mostarlić, Sifet Hasić, Hasan Mešanović, Senudin Husagić i Fakib Jahić.

SG PK „Grivice“ u koju su izabrani: Hajrudin Salihbašić – predsjednik Sindikalne grupe, Nihad Pirić, Omer Kamberović, Vahid Bajrić i Mihret Varešević.

SP „Podzemna eksploatacija uglja“ u koju su izabrani: Samir Rahmanović – predsjednik Sindikalne podružnice, Mevludin Imširović, Edis Varešević, Nedžad Kurtić i Zijad Hasić.

SP „Željeznički transport“: Ibrahim Demirović – predsjednik Sindikalne podružnice, Asim Ikanović, Muzafer Sarić, Hasan Zejnilović i Nezira Brigić.

SP „Separacija“ u koju su izabrani: Fahrudin Pozderović – predsjednik Sindikalne podružnice, Amir Džinić, Hakija Brigić, Jasmin Kukić i Zehrudin Handalić.

SP „Direkcija“ u koju su izabrani: Sifet Ikanović – predsjednik Sindikalne podružnice, Mehmed Klopić, Nedžad Nurković, Mugdin Husić i Amir Bećirović.

SP „Standard i usluge“ u koju su izabrani: Samir Mostarlić – predsjednik Sindikalne podružnice,





Rahman Dostović, Edina Čolić, Ismira Husić i Safet Šehić.

Prema utvrđenim pravilima u Sindikalni odbor RMU „Banovići“ ulaze predsjednici Sindikalnih podružnica, te predstavnici određenih radnih cjelina radi ravnopravne zastupljenosti svih Radnih jedinica tako da se izbornim rezultatima dolazi do 10 članova Sindikalnog odbora. Nakon izbora predsjednika Sindikalne organizacije na mjesto 11-og člana Sindikalnog odbora dolazi kandidat sa najvećim brojem glasova iz Sindikalne podružnice iz koje je izabran predsjednik Sindikalne organizacije.

U Sindikalni odbor Sindikalne organizacije rudnika „Banovići“ imenovani su: Mirsad Kukić, Sifet Ikanović, Šaban Mešanović, Hajrudin Salihbašić, Enver Bojić, Samir Rahmanović, Mevludin Imširović, Fahrudin Pozderović, Ibrahim Demirović i Samir Mostarlić.

Pošto je utvrđen sastav Sindikalnog odbora RMU „Banovići“ d.d. Banovići, predsjedavajući Skupštine članovima Sindikalnog odbora omogućio je da predlože kandidate za predsjednika Sindikalne organizacije.

Mešanović Šaban, kao član Sindikalnog odbora, za predsjednika Sindikalne organizacije predložio je dr. Mirsada Kukića obrazloživši svoj prijedlog činjenicom da je sa svih kandidacionih zborova upućena inicijativa delegatima Skupštine da dr. Kukića izaberu za predsjednika Sindikalne organizacije.

Obzirom da nije bilo više prijedloga delegati Skupštine su jednoglasno za predsjednika Sindikalne organizacije izabrali dr. Mirsada Kukića koji se zahvalio na ukazanom povjerenju i u kratkom obraćanju istakao da će povjerenu dužnost shvatiti veoma ozbiljno, da će raditi za dobrobit rudara ovog kolektiva te da će u punom kapacitetu biti na raspolaganju svakom članu Sindikata.

Nakon izbora predsjednika Sindikalne organizacije Rudnika kao jedanaesti član Odbora sa najvećim brojem glasova ušao je Mehmed Klopić iz Sindikalne podružnice „Direkcija“.

Kao gost na izbornoj Skupštini, obratio se i direktor RMU „Banovići“ d.d. Banovići dr. Munever Čergić koji je čestitao novoizabranim predstavnicima Sindikata, iskazao svoje zadovoljstvo dosadašnjim partnerskim odnosom menadžmenta rudnika „Banovići“ i predstavnika Sindikata. Mišljenja je da će saradnja u narednom periodu biti još bolja jer i menadžment i Sindikat imaju iste ciljeve, a to je očuvanje ovog kolektiva, svakog radnog mjesta i puna podrška budućim projektima zacrtanim u planovima rudnika „Banovići“.



POTPISAN NOVI KOLEKTIVNI UGOVOR IZ OBLASTI RUDARSTVA:

RADNICIMA VEĆE SATNICE I OTPREMNINA ZA ODLAZAK U PENZIJU



Novi Kolektivni ugovor iz oblasti rudarstva potpisan je početkom decembra u Sarajevu između Vlade FBiH i Sindikata rudnika. Rok trajanja Ugovora je 18 mjeseci s tim da se može produžiti ukoliko na njega ne bude primjedbi.

Potpisani Kolektivni ugovor ima za cilj poboljšati standard preko 12.000 rudara na području Federacije BiH. Iz tog razloga u njega je uvedeno niz novina. Jedna od njih je i povećanje radne satnice sa 2,40 KM na 2,50 KM, kao i povećanje otpremnine za odlazak u penziju sa dosadašnjih pet na šest prosječnih plata preduzeća ostvarenih u prethodna tri mjeseca.

Novina u Ugovoru je i poglavlje solidarnosti po kojem je poslodavac dužan da primi u radni odnos jednog člana porodice smrtno stradalog rudara. Utvrđeno je da radnik koji u preduzeću radi 35 godina, a zbog bolesti ili drugih opravdanih razloga nije u mogućnosti

obavljati zadate poslove, može biti raspoređen na drugo radno mjesto, ali mu se pri tome ne mijenja visina plate utvrđena prethodnim rješenjem.

Došlo se do kompromisnog rješenja i kada je u pitanju promjena radnog vremena, prema Ugovoru radna sedmica traje 40 sati, a puno radno vrijeme 8 sati.

Pozitivni iskoraci novog Kolektivnog ugovora dovode do poboljšanja i kada je u pitanju prevoz radnika. Regulirano je da radniku pripada pravo na naknadu troškova prevoza na posao i sa posla u skladu sa Ugovorom o radu i Pravilnikom o radu preduzeća.

Uvedena je i jubilarna nagrada za Dan rudara koja se zasniva na vrednovanju proizvodnog rada rudara, a regulirana je Pravilnikom o radu rudnika. U Kolektivni ugovor unešena je i odredba o formiranju zajedničke komisije Sindikata i poslodavaca koja će po potrebi tumačiti pojedine odredbe Ugovora, kao i to da će predstavnici Sindikata od sada prisustvovati sjednicama Nadzornog odbora

Predsjednik Samostalnog sindikata rudara FBiH dr. Safer Mušanović ocijenio je potpisani Ugovor iz oblasti rudarstva jednim od najboljih u posljednjih 25 godina, rekavši da je on rezultat kvalitetnog dogovora, kompromisa i intenzivnog rada svih učesnika u pregovorima. Zahvalio se sindikalnim partnerima i svima koji su omogućili postizanje dogovora.

Novi Kolektivni ugovor je kompromisno rješenje kojim su u velikoj mjeri zadovoljeni zahtjevi radnika, zaštićena osnovna i dodatna prava, te u ovom momentu obezbijeđeni najbolji uslovi za zaposlenike ovog sektora.



NOVA ZAPOŠLJAVANJA U RMU „BANOVIĆI“ D.D. BANOVIĆI

POSAO ZA 16 VISOKOOBRAZOVANIH KADROVA



Menadžment Rudnika „Banovići“ odlučio je da zbog potrebe izvršenja poslovnih zadataka, ali i budućih razvojnih planova preduzeća, u radni odnos primi nove visokoobrazovane radnike za koje je 30. novembra upriličen i prijem. Šesnaest mladih inženjera rudarskog, mašinskog, elektro – energetskog i tehnološkog smijera dobilo je priliku testirati i usavršavati svoje znanje u jednom od najrazvijenijih preduzeća u rudarskom sektoru.

Radnicima je Ugovor o radu na određeno vrijeme uručio direktor Rudnika dr. Munever Čeragić.

- Nadam se da ćete radom i posvećenošću opravdati dato povjerenje, te angažovano i disciplinovano izvršavati svakodnevne radne zadatke kako bi pomogli u ostvarenju ciljeva koji se nalaze pred ovim preduzećem. Tek sada slijedi stručno osposobljavanje i usavršavanje, a od vas samih zavisi ishod i napredovanje u budućnosti. – kazao je dr. Munever Čeragić.

Dobrodošlicu u rudarski kolektiv novim radnicima poželio je i izvršni direktor za tehničke poslove dr. Ibrahim Lapandić, napominjući da se radi o preduzeću koje se bavi opasnom i specifičnom djelatnošću, te da je potrebno od samog početka voditi računa o sigurnosti sebe i drugih članova kolektiva.

- Očekujem da budete uzorni radnici da poštuju pravila i način rada ovog preduzeća, te da kroz interakciju sa drugim iskusnijim radnicima stalno učite. – rekao je dr. Lapandić.

Ovim činom broj visokoobrazovanih radnika u Rudniku porastao je na 271, čime je stvoren preduslov za osposobljavanje i pripremanje kadrova koji će učestvovati u gradnji i rukovodstvu Termoelektranom u Banovićima. Nakon određenog perioda obaviti će se stručno testiranje radnika, a samo najbolji biće raspoređeni na najodgovornija radna mjesta vezana za rad u Termoelektrani, gdje će se donositi najbitnije i najveće odluke. Nastojanja su da se na vrijeme stručno osposobe i pripreme kadrovi sa općine Banovići u čijim će rukama ostati ovaj kolektiv.

Pripremanje kadrova započelo je 01. decembra, a nekoliko dana kasnije bili smo na radnom mjestu onih koji su preraspodjelom posao dobili u pogonu „Podzemna eksploatacija uglja“. Zatekli smo ih u radnoj atmosferi potpuno pripremljene za posao. Kroz razgovor se moglo osjetiti uzbuđenje zbog pružene prilike i novih iskustava. Iako su neki već imali priliku kroz pripravnički staž biti dio ovog preduzeća, među njima ima i onih koji se prvi put susreću sa ovom vrstom posla.

Semir Šehić inženjer je rudarstva od 2015. godine, svoje prvo radno iskustvo kroz pripravnički staž stekao je upravo u ovom Rudniku na površinskom kopu „Grivice“. Od 01. decembra je uposlenik pogona „Podzemne eksploatacije uglja“ u ulozi inženjera tehnološkog procesa koji sa kolegama nestrpljivo čeka prvi ozbiljniji poslovni zadatak.



- Obzirom da sam jedno vrijeme radio u privatnoj firmi mogu reći da je ovdje znatno drugačije. Bolji su uslovi za radnike i budućnost je izvjesnija. Zahvalan sam što smo dobili priliku za dokazivanje. Ispred nas je dug put i nastojat ćemo zadovoljiti očekivanja menadžmenta i maksimalno doprinijeti ovom kolektivu. – kaže Semir Šehić.

U „Podzemnu eksploataciju uglja“ raspoređen je i Senad Husić također inženjer rudarstva. Obzirom da je fakultet završio prije četiri godine i da za to vrijeme nije mogao naći adekvatno zaposlenje, rješenje je tražio u privatnim firmama na određeno vrijeme.



- U potpunosti se slažem da je u državnoj firmi mnogo lakše, ne zato što ćemo mi ovdje manje raditi nego što su uslovi znatno bolji, radnik se poštuje i zaradeno se uvijek dobije na vrijeme. Prvi put kao radnik Rudnika susrest ću se sa poslovima u jami, što je poseban izazov. – rekao je Senad Husić.

Svoje prvo radno iskustvo u pogonu „Podzemna eksploatacija uglja“ započeo je i Nermin Mostarlić. Rudarski fakultet završio je 2015. godine i tada je kao student u okviru prakse silazio u jamu. Sada čeka drugu priliku ali kao zaposlenik Rudnika. Nakon odrađenih 15 dana teoretske prakse sići će u jamu da

upozna način rada i proizvodnog procesa za koji će u narednom periodu velikim dijelom biti i odgovoran, kako on tako i ostale kolege.



- Silazio sam i u jame drugih rudnika a obzirom da naša jama važi za jednu od najsigurnijih nije me strah. Svjesni smo da opuštanja ne smije biti i da opreza nikad nije dosta. Često vodimo razgovore na tu temu i mogu reći da smo potpuno spremni za silazak. – rekao je Nermin Mostarlić.

Momak iz novoprimitljene ekipe koji na posao čeka nešto duže od ostalih je Mersudin Jamaković, također inženjer rudarstva. Diplomom je dobio 2008. godine poslije čega je odradio pripravnički staž. Nakon skoro 10 godina provedenih na BIRO-u za zapošljavanje prvi put dobija priliku da se okuša u svojoj struci.



- Zahvalan sam na pruženoj prilici i nadam se da ću je maksimalno opravdati. Ovdje sam da radim i učim. Posao će vjerovatno biti zahtjevan ali uz dobru obuku ne bi trebalo biti većih problema. Vrijeme je da praktično pokažemo sve ono što smo godinama kroz školovanje učili. – rekao je Mersudin Jamaković.

Oglas za prijem u radni odnos bio je otvoren 20.10.2017. godine na koji su pristigle 73 prijave, od toga 31. nepotpuna. Kao što je slučaj bio i do sada podnosioci prijave su bodovani po ranije utvrđenim kriterijima i to: po osnovu pripadnosti određenoj grupaciji kao što su šehidske porodice, porodice poginulog radnika Rudnika, RVI, demobilisani borci i socijalni slučajevi, zatim po osnovu broja članova u domaćinstvu, vremena provedenog na BIRO-u za zapošljavanje, intervjua i stručnog testiranja.

ISPRAĆAJ PENZIONERA RMU „BANOVIĆI“ D.D. BANOVIĆI

PENZIONISAN REKORDAN BROJ RADNIKA



Rudnik „Banovići“ je na dostojanstven način ispratio sve one koji su prethodnih 40 godina pošteno i časno radili i zaključno sa ovom godinom stekli uslove za penzionisanje. U sklopu 21. decembra Dana rudara BiH organizovan je ispraćaj za 160 bivših uposlenika Rudnika, što je ujedno i najveći broj penzionisanih radnika od poslijeratnog perioda.

Na tradicionalnom mjestu okupili su se penzioneri svih pogona koji su uz ručak, ugodno druženje, muziku i prigodne poklone obilježili ovaj svečani dan.

Na prijemu u ime rukovodstva Rudnika govorio je Emir Rahmanović predsjednik Komisije za ispraćaj penzionisanih radnika u 2017. godini, te im ovom prilikom zahvalio na angažmanu i doprinosu koji su dali preduzeću, uz iskrenu želju da penzije koje su zaradili još dugo godina koriste u zdravlju. Penzionerima su uručeni i pokloni, ručni sat sa posvetom i rudarski štap.

Mnoge generacije porodica iz ovog rudarskog grada provele su svoj radni vijek u podzemnim tunelima i na kopovima Rudnika. Kako akteri ove priče kažu, sada je vrijeme za one mlađe.

U penziju na ovogodišnji Dan rudara bez mnogo odsustvovanja i bolovanja ide i Darinka Žerić.



- Iako se nekada činilo nedostižno sretna sam što sam uspjela dočekati da proslavim 40 godina rada u ovom kolektivu. Za Rudnik će me vezati samo divne uspomene, dobro društvo, odnos prema radnicima i uslovi u kojima smo radili. Kao

mašinski tehničar od 1977. godine obavljala sam poslove tehničke pripreme po pogonima, najviše na Bešinu i Čubriću. Ovom prilikom pozdravila bih sve radnike Rudnika, a penzionerima poželjela redovnu penziju, lijep život i dobro zdravlje, a sve ostalo što im nedostaje vjerujem da će nadomjestiti. – kazala je Darinka Žerić.

Sa 40 godina staža iz sebe Senad Husanović započinje novu životnu etapu. Na tzv. „treće doba“ još uvijek se privikava i kako kaže nije jednostavno, jer je samo do prije nekoliko mjeseci napredak Rudnika pratio sa svog radnog mjesta.



- Davne 1982. godine počeo sam raditi u jami „Omazići“. Radni vijek je tekao normalno sve do 1995. godine kada sam nastradao i postao invalid rada zbog čega pamtim i dobre i loše radne dane, ali takva je situacija u rudnicima. Napunio sam 38,5 godina radnog staža u Rudniku i 1,5 godinu tokom rata. Danas sam tu sa pomiješanim osjećanjima. Teško je zaboraviti na radnu obavezu, ali sigurno ću i u penziji pronaći adekvatnu zanimaciju poput planinarenja i rekreacije. – rekao je Senad Husanović.

Od električara iz „Površinske eksploatacije uglja“ do šefa opštih poslova u pogonu „Željeznički transport“ put je kojim je kroz 40 godina rada prošao Sead Talović.



- Svoj radni vijek započeo sam 1976. godine u Hrvatskoj, zatim u Koksari u Lukavcu. Poslije toga sam došao u rudnik „Banovići“ gdje ostajem sve

do danas kada sam zvanično ispraćen kao penzioner ovog kolektiva. Prvo sam radio u pogonu „Površinska eksploatacija uglja“ kao električar, zatim sam prešao u pogon „Željeznički transport“ odakle sam i penzionisan sa mjesta šefa za opšte poslove. Govorili su mi da će biti teško kada dođe ovaj dan, al mogu reći da su utisci pozitivni. Ovo je prirodan slijed događaja i drago mi je da sam doživio penziju. Sada za mene počinje drugačiji način života, opušteniji i mirniji. – rekao je Sead Talović.

Prvo radno mjesto dobro pamtim. Nije bilo svejedno, oči i uši morale su dobro da se otvore, počinje svoju priču Adem Brčaninović.

- Počeo sam raditi kao fizički radnik u jami „Omazići“ sve do prebacivanja na mjesto električara 1983. godine. Tih osamdesetih godina rad u jami bio je znatno teži i naporniji nego danas, ali niko od nas se nije štedio. Kao mladi radnik nisam znao za bolovanje i slobodne dane sve do nesretnog rata kada sam postao ratni invalid. Povratkom u Rudnik nisam bio u mogućnosti raditi stare poslove, pa sam preraspoređen na rad u lampari,



a zatim i u magacinu gdje sam i dočekao penziju. Radni vijek ću pamtili po dobrom, druženje sa kolegama je bilo posebno. Uvijek sam bio na strani radnika, što govori i moje dugogodišnje članstvo u Sindikatu rudnika i moja „titula“ predsjednika Sindikata podružnice „Podzemna eksploatacija uglja“. Smatram da sam ostavio pečat u ovom Rudniku, što kroz rad, što kroz sindikalne aktivnosti. Jedan od posljednjih projekata urađenih na moju inicijativu je i prošlogodišnja izgradnja spomen obilježja poginulim radnicima Rudnika „Podzemna eksploatacija uglja“. – kazao je Adem Brčaninović.

U POVODU DANA RUDARA

ORGANIZOVAN PRIJEM PORODICA ŠEHIDA I POGINULIH BORACA RUDNIKA „BANOVIĆI“

Ove godine u sklopu aktivnosti obilježavanja 21. decembra Dana rudara BiH organizovan je prijem za članove 76 porodica šehida i poginulih boraca Rudnika. Početkom decembra predstavnici Rudnika su zajedno sa porodicama položili cvijeće i odali počast žrtvama rata na Centralnom spomen obilježju u Banovićima.

Tom prilikom uručena je simbolična novčana pomoć u iznosu od 50 KM i organizovan ručak u prostorijama Radničkog Doma.

Prisutnima se u ime Rudnika obratio Emir Rahmanović predsjednik Komisije za prijem porodica šehida i poginulih boraca, koji se zahvalio porodicama na dolasku i kroz razgovor naglasio da je briga za porodice šehida, prvenstveno za njihovu djecu, briga za budućnost.

- Naša moralna obaveza i ljudska odgovornost je da svim žrtvama stradanim za dobrobit ovog kraja odamo priznanje i dužnu počast. – rekao je Emir Rahmanović.



RADNIČKE SPORTSKE IGRE

PRELAZNI PEHAR U POGONU „POVRŠINSKA EKSPLOATACIJA UGLJA“



Sportsko takmičenje radnika rudnika „Banovići“ i ove godine izrodilo je nove prvake. Sveukupni pobjednik nije se znao do zadnjeg momenta, a nakon prošlogodišnjeg „kiksa“, radnici „Površinske eksploatacije uglja“ prelazni pehar uspjeli su vratiti u svoj pogon. Drugo mjesto u sveukupnom poretku pripalo je „Podzemnoj eksploataciji uglja“, dok se na trećem mjestu našla „Separacija“.

Tradicionalno se takmičilo u pet sportskih disciplina, i to: povlačenju konopca, malom nogometu, stonom tenisu, šahu i kuglanju.

Početak takmičenja obilježilo je natjecanje u kuglanju u kojem su predstavnici „Podzemne eksploatacije uglja“ osvojili prvo mjesto, „Separacija“ drugo, a „Površinska eksploatacija uglja“ treće mjesto. Za najboljeg kuglaša proglašen je Redžo Tabaković.

U povlačenju konopca najviše sreće ali i spretnosti imali su takmičari „Podzemne eksploatacije uglja“, drugo mjesto pripalo je ekipi „Separacije“, a treće „Površinskoj eksploataciji uglja“. Za najboljeg konopasa proglašen je Nermin Turić.



Sa najviše žara i najboljom navijačkom atmosferom ispraćeno je takmičenje u malom nogometu. Prvi u ovoj sportskoj disciplini bili su predstavnici „Površinske eksploatacije uglja“, u stopu ih je slijedila ekipa „Podzemne eksploatacije uglja“, dok je na trećem mjestu završila ekipa „Separacije“. I u ovoj disciplini birani su najbolji pojedinci, pa je tako za najboljeg fudbalera izabran Mirel Čamrković, najboljeg stijelca Samid Suljić, dok je najbolji golman bio Nermin Šahbazović.

Neizostavno je bilo i natjecanje u šahu, po mnogima najrelaksirajućoj disciplini ovog takmičenja. Šahisti „Površinske eksploatacije uglja“ imali su najviše koncentracije i umjeća te su samim tim i zauzeli prvo



mjesto. Na drugom mjestu bili su šahisti „Standarda i usluga“, a treći šahisti „Direkcije“. Kada je u pitanju najbolji pojedinac u ovoj disciplini došlo je do podjele prvog mjesta, jer su šahisti Safet Garić i Čazim Aljić osvojili isti broj bodova.

Stonotenisači „Površinske eksploatacije uglja“ i ove godine bili su najbolji ostavivši iza sebe ekipu „Separacije“ i „Podzemne eksploatacije uglja“. Priznanje za najboljeg stonotenisera dobio je Sead Lisičić.

Takmičenje je i ovaj put proteklo u sjajnoj atmosferi iako je došlo do promjene organizatora rudarskih igara. Na mjesto Seada Talovića dugogodišnjeg domaćina radničkih sportskih igara, koji je ove godine otišao u zasluženu penziju, došao je Zijad Lačić. Iako prvi put u ovoj ulozi, posao je odradio bez greške.

Ovakve igre su potrebne rudarima, to se ovih dana najbolje vidjelo kroz natjecanja i druženja. Bilo je to dobro raspoloženje i vrhunska atmosfera bez

ijednog ispada. Kod takmičenja ovakve vrste najmanje je bitan rezultat, međutim na kraju se ni to nije prepustilo slučaju. Rudnik će po svemu



sudeći završiti još jednu uspješnu poslovnu godinu, a mi smo na to stavili tačku u sportskom smislu. – rekao je Zijad Lačić.



MALONOGOMETNI TURNIR POVODOM DANA RUDARA BiH

ŠKOLA FUDBALA "BUDUĆNOST" BANOVIĆI PO TREĆI PUT DOMAĆIN TURNIRA



U organizaciji škole fudbala "Budućnost" Banovići u sklopu obilježavanja 21. decembra Dana rudara BiH održan je malonogometni turnir za dječake rođene 2006. i 2007. godine. Na turniru koji je prošlog vikenda odigran u Sportskoj dvorani Banovići učesće su uzele 24 ekipe iz nekoliko gradova BiH.

Cilj ove manifestacije je druženje i učenje fudbalskih vještina mladih koje je jedino moguće uz dobar trening i kvalitetne turnire. Na turniru je učestvovalo preko 350 dječaka, a generalni sponzor i ove godine bio je rudnik "Banovići".

Prvog dana turnira trofej je osvojila ekipa Napredak iz Zavidovića koja je u finalu nakon izvođenja penala savladala FK "Budućnost" Banovići. Treće mjesto pripalo je ekipi ŠMT BiH 2007. Za najboljeg igrača turnira izabran je Amel Ćorić (SMT BiH), dok je za najboljeg golmana izabran Rijad Sinanović (Napredka Zavidovići). Za najboljeg strijelca izabran je Haris Berbić (FK „Budućnost“ Banovići).

Drugi dan turnira najbolja je bila ekipa Soccer kids iz Bijeljine koja je u finalu savladala FK "Budućnost" Banovići rezultatom 1 – 0. Treće mjesto pripalo je ekipi Eurogol Živinice. Za najboljeg nogometaša proglašen je Miko Davidović (Soccer Kids Bijeljina), a za najboljeg golmana Kemal Begić (FK "Budućnost" Banovići). Za najboljeg strijelca izabran je Emin Kamberović (ŠN Colibri Tuzla)

- Ovog vikenda imali smo priliku ugostiti ekipe iz brojnih gradova BiH. Turnir je bio dobra prilika za veliki broj polaznika koji su odmjerili snagu i kvalitet sa vršnjacima iz drugih timova. U ime cijelog Kluba imam potrebu da se posebno zahvalim rudniku "Banovići" koji nas već treću godinu za redom, kao generalni sponzor, uvrštava u program obilježavanja Dana rudara BiH. - kazao je Muris Čekmić, trener u školi fudbala "Budućnost" Banovići.

Na sportskom terenu i ovog vikenda mogli smo vidjeti kvalitetan mali nogomet i veliki broj potencijalnih nogometnih talenata, a na tribinama veliki broj navijača koji su bodrili svoje timove.





Kud pri je hrabri danja rocu
u vjek radu sa pomom i uz
prijem iz dubina voda
Mi jenu se mijene uz pozdrav
rudara SRETNO jer tu bratstva lju
vudu i tocu tako ostati vječno.

SRETNO



ČESTITKA



SRETNO

Dragi rudari sretni vam Vaš dragi redovnikar
Zelo vam djacuz Ju Djaciye obilunil em
Banovici



JU "Dječije obdanište" Banovici

ODGOJ I NJEGA DIJETETA

ČESTITKA

U POVODU DANA RUDARA 21. DECEMBRA,
UPUĆUJEMO ISKRENE ČESTITKE SVIM
UPOSLENICIMA RMU BANOVIĆI SA ŽELJOM,
PUNO ZDRAVLJA, RADNIH USPJEHA,
ISKOPANIH TONA UGLJA UZ RUDARSKI
POZDRAV SRETNO!

*Djeca i uposlenici
predškolske ustanove Banovici*



RMU BANOVIĆI
1946-2047

SRETAN DAN RUDARA
21. DECEMBAR


VOZIC!

SVAKE NOCI SVAKOG DANA
VOZI UŠAS VOZIC NAS.

KADA ČUJEŠ TU SJERENU ZA
MEGA TI DINAH ZMAŠ

VOZI UŠAS SVAKE NOCI,
SVAKI DAN.

ZBOG MEGA SAM JAKO SRETAN,
JAKO SRETAN, RADOŠTAN!



SRETAN VAM
DAN RUDARA
OD NAJMLADIH SUGRAĐANA
IZ "DJEČIJEGRADA
BANOVICI
SRETNO!



RUDAR informativna novina radnika
RMU "Banovici" d.d. Banovici

www.rmub.ba

Uređuje Redakcioni odbor:

Samir Numanović, predsjednik
Amela Kantić, urednica
Melisa Čaušević, novinar- saradnik
Fertik Glibanović
Salko Gutić
Šehval Lapandić

DTP i štampa: "OFF SET" Tuzla

Riješenjem Republičkog komiteta
za informacije broj 04-651-537/77
od 6.9.1977.

List je uveden u Registar štampe R BiH.

E-mail: kontakt@rmub.ba
nadzorni.odbor@rmub.ba